



## Векало ЯхІуда яздина кехат

*ЯхІуда яздинчу кехато* шаш тешархой бу аьлчачу харцхьехамчашна дуйхьал дІахьедар до. ХІара доца кехат *векало Кипас яздинчу шолгІачу кехатах* тера ду. Шен кехатца яздархочо дешархой иракарахІиттабо: «Дала делла долу тешар чІагІдарехьа кыйсам латтабе», – бохуш.

*Дешхьалхе*

**1** <sup>1</sup>Дала леррина кьобалвинчу Іийсан лено, Якьубан вашас, ЯхІуда Дала тІекхайкхинчу а, Да волчу Далла безачу а, Дала леррина кьобалвинчу Іийсас ларбечу а нахе: <sup>2</sup>Делан кьинхетам а, синпаргІато а, безам а совболийла шуна юкьахь.

*Харцхьехамчаш*

<sup>3</sup>Хьоменаш! Вайн массеран а кІелхьардовларх яздан кІорга лаам боллушехь, шуьга, цкъа массо а ханна Дала Шен нахана делла долу дин чІагІдарехьа кыйсам латтабе аьлла, яздан дезаш хийтира суна, <sup>4</sup>хІунда аьлча шуна уллохь хІилланца нисбелла цхьа Іеса нах. Дукха хенахь дуйна Делан Йозанашкахь дІаяздина ду, Дала царна кхел йийр ю аьлла. Вайн Делан маьхза долчу диканых лаьцна болу кхаь харцахьа берзийна цара, шайн маьтгаза лелар бакьдархьама. Ткъа цхьаь бен воцу вайн Хьалдолу а, Веза а Эла, Дала леррина кьобалвина Іийса, тІе ца оьцу цара.

<sup>5</sup>Шуна иза хууш делахь а, шуна дагадаийта лаьа суна, Везачу Эло Мисармахкара Шен халкъ арадаккхар а, амма тІаьхьо халкъана юкьара Шех патешнарш хІаллакбар а. <sup>6</sup>Иштта шуна дагадан деза, шайн даржана реза ца хилла а, шайн хІусам дІатесна а долу маликаш, гуттаренна а йолчу ханна буржалш а тоьхна, боданехь латтадо Цо доккхачу кьематдийнахь кхел ярхьама.

<sup>7</sup>Дагахь латтаде иштта, и маликаш санна, телхина яра Седам а, Іамор а, царна гонахара гІаланаш а. Маьтгаза хІуманаш лелийна йолу а, боьха гІуллакхаш лело лууш йолу а уьш гуттаренна а йогуш йолчу цІеран

<sup>1:1</sup> Маттай 13:55; Марк 6:3. <sup>1:5</sup> Арадаккхар 12:51; Лелар 14:29, 30. <sup>1:7</sup> Доладалар 19:1-24.

таIзаран кхелана йитина ю кхечарна масална. <sup>8</sup>Иштта сатийсаре бевллачу кху наха шайн догIмаш а бехдо, хьаькамаш а ца лору, стигалан сийлаллин бахархой а емалбо. <sup>9</sup>Мусан докьах лаьцна ша иблисаца къуьйсучу хенахь коьртачу Микаал-малико, Iоттар еш бехке хIума ала а ца даьхьна, иштта аьлла: «Везачу Эло таIзар дойла хьуна». <sup>10</sup>Амма кху наха шайна цахуург емалдо. Шайн амалшка хьаьжжина, шаьш, луьра дийнаташ санна, кхета хIуманаш бахьана долуш цара шаьш хIаллакбо. <sup>11</sup>Къа ду церан, хIунда аьлча Кхаиман новкъахула боьлхура уьш, БалиIам санна, кхаьнашка марзбелира уьш, Кхорахь санна, гIевттира уьш, ткъа иза санна, хIаллак а хир бу уьш. <sup>12</sup>Шун бертан пхьорашкахь цу наха шу юьхьIаьржачу хIиттадо. Эхь ца хеташ, шуьца шуьнехь Iаш бу уьш, амма шайн бен бала хир бац церан. Мохо лело, догIа доцу мархаш ю уьш, стом боцу гуьйренан дитташ ду, шаьш лаьттах орамашца схьадахарна шозза делла долу. <sup>13</sup>Шайн эхьечу гIуллакхийн чопа тIеяьлла йолу хIордан буьрса тулгIенаш ю уьш, кхерста седарчий ду уьш, гуттар а лаьттачу Iаьржачу боданехь меттиг кечийна долу.

<sup>14</sup>Адаман ворхIалгIачу тIаьхьенах волчу ХIаноха а Делера болу хаамбина царах: «Веза Эла ву Шен дагар ца даллал дукха долчу дезачу маликашца вогIуш <sup>15</sup>массарна а кхел ян а, адамашна юкьара Iеса нах цара дина Iеса гIуллакхаш бахьанехь а, Далла духьал аьлла кIоршаме дешнаш бахьанехь а уьш бехке бан а».

<sup>16</sup>Цхьана а хIуманна реза а боцуш, шайн вочу лаамашка хьаьжжина а лелаш, хамталлаш еш болу нах бу уьш. Дегала дешнаш ду церан багахь. Шайн аьттонна нахана хьестало уьш.

*Лардар а, хьехам бар а*

<sup>17</sup>Амма аша, хьоменаш, дагахь латтаде вайн Везачу Элан, Дала леррина къобалвинчу Iийсан векалша хир ду аьлларг. <sup>18</sup>Цара бехира шуьга, тIаьхьарчу хенахь богIур бу шайн Iесачу лаамашка хьаьжжина лелаш, кхаьрдаш болу нах. <sup>19</sup>Шу вовшах а къобстуьйтуш, шайн синойн лаамашна тIаьхьабевлла лела нах бу уьш. Цаьрца Делан Са дац. <sup>20</sup>Ткъа аша, хьоменаш, шайн уггар дезачу динехь чIагI а луш, Делан Синан гIоьнца доIанаш а деш, <sup>21</sup>Делан безамехь шаьш Iалашде, вайн Везачу Эло, Дала леррина къобалвинчу Iийсас, Шен къинхетамца Дела волчоьх хедар доцу дахар даларе а хьобжуш.

<sup>22</sup>Шеко йолуш болчаьрца къинхетаме хила, <sup>23</sup>вуйш, цIергара схьа а бохуш, кIелхьарбаха, ткъа кхечаьрца, лар а луш, къинхетаме хила, амма церан хьарамчу сино сийсазийна бедар ма еза.

<sup>1:9</sup> Даниал 10:13, 21; 12:1; Довзийгинарг 12:7; Карлабаьккхинарг 34:6; Закри-ЯхIу 3:2. <sup>1:11</sup> Доладалар 4:3-8; Лелар 22:1-35; Лелар 16:1-35. <sup>1:14</sup> Доладалар 5:18, 21-24. <sup>1:18</sup> 2 Кипин 3:3.

*Хасторан доIа*

<sup>24</sup>Шу охьаэгарх лардан а, цIена а долуш, доккхачу хазахетарца Шен сийлаллина хьалха хIотто а ницкъ бу Делан. <sup>25</sup>Цхьаь бен воцучу а, вайн Веза Эла волчу, Дала леррина къобалвинчу Iийсагахула вай кIелхьардохучу а Далла сий а, паччахьалла а, ницкъ а, олалла а хуьлийла, азалера дуййна а, хIинца а, абаденналц а. Амин.